

# Tut en l'ensaina da la trilinguitad

Preschentaziun dal nov profil directiv da la scola chantunala grischuna

■ (anr/grc) Il november 2006 ha la direcziun da la Scola chantunala grischuna dà l'incumbensa d'elavurar il nov profil directiv a la gruppa directiva «qualità e profil». Ier, in onn e mez pli tard, han il directur da la Scola chantunala grischuna *Gion Lechmann*, il manader da l'Uffizi chantunal per scolaziun pli auta *Hans Peter Märchy* e *Josef Züger*, manader da la gruppa da lavur, preschentà il nov «Profil directiv» da questa scola.

## Involids personas dal scolar, ed ils scolasts fin geniturs

Sco che il rector da la Scola chantunala grischuna *Gion Lechmann* ha fatg a savair saja quest profil directiv vegnì elavurà cun agid d'in workshop a Falerà l'avrigl 2007. Var 50 personas, scholaras e scolars, magistras e magisters, geniturs, scolars anteriurs, represchentants da las autoritads e personas d'ordaifer han gi fatg part da quest workshop. La lavur che è vegnida prestada ha alura servì sco basa per ils dis davart il profil directiv che han gi lieu l'entschatta october 2007 al Plantahof cun tut la magistraglia, las collavuraturas ed ils collavurats da la Scola

chantunala dal Grischun. Quai sajan tut en tut circa 170 impiegads.


Il november 2007 èsi vegnì preschenta in resultat intermediar. Las facultads, ils servetschs sco administraziun e logistica, las scholaras ed ils scolars han survegnì la pussaivladad da prender posiziun e far propostas. Quellas sajan vegnidas elavuradas da la gruppa directiva. Sin proposta da quella e da la direcziun da la scola chantunala han il mez favrer 2008 tut las collavuraturas approvà il text dal profil reelavurà. *Gion Lechmann* spera che quest carnet da radund 25 paginas en format A5 na daventia in «palpiri da truclet». Impurtant saja era da realisar quest nov profil directiv en la pratica.

«La Scola chantunala grischuna, sco Scola media publica dal chantun, ha l'incumbensa statala da furnaziun ed educaziun ed exequischa era quella. Ella resguarda la trilinguitad chantunala, tudestg, rumantsch e talian cun far realisar ses plans d'instrucziun. Ella offra las partiziuns gimnasi da lunga e gimnasi da curta durada, la scola media commerziala e la scola media propedeutica cun insa vasta purschida da roms d'elecziun, roms

d'accent, roms complementars, roms da tscherna da professiun e roms facultativs. A basa da la lescha è la Scola chantunala grischuna la scola da referenza per las scolas medias privatas dal chantun Grischun. Il profil directiv serva sco basa per il svilup da la Scola chantunala grischuna. El vegn periodicamain examinà e surlavurà», èsi scrit en la declaraziun sco introducziun da quest profil directiv.

La finamira da la direcziun da la Scola chantunala grischuna saja dad era realisar quest project directiv tenor il motto «la scola essan nus», ha *Gion Lechmann* declarà e fatg a savair che ina classa cun rom d'accent grafica haja realisà quest quadern en cuminanza cun in graficher. Cura che il directur da la Scola politecnica federala (SPF) haja fatg ina giada ina visita a la Scola chantunala grischuna haja quel ditg che in scolar chantunal cun matura stoppia savair trais chaussas. El stoppia savair tge chel veglia studegiar, stoppia avair abilitads e stoppia savair lavurar, ha *Gion Lechmann* sa ragurdà.

Il nov profil directiv entra en vigur l'onn da scola 2008/09 per quatter onns.



**Josef Züger, Gion Lechmann e Hans Peter Märchy (da san.) han preschentà il nov profil directiv triling da la Scola chantunala grischuna.**